

**BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
SKUPŠTINA KANTONA SARAJEVO**

28.radna sjednica

n/p predsjedavajuće, prof. Ana Babić

INICIJATIVA

S obzirom da već predugo imamo praksu u kojoj je nepoštivanje regulacionih planova na Ilidži postalo gotovo pa standard, smatram da je više nego neprihvatljiva šutnja i pasivna uloga svih nadzornih institucija na nivou Kantona koji imaju svoju ulogu i mandat, kad su ovakve stvari u pitanju.

Ne želim da vjerujem kako je šutnja i neaktivnost institucija posljedica političkih pritisaka ili nečeg težeg, ali nastavak prihvatanja anarhije u prostorno - planskom divljanju na Ilidži će nas odvesti u daleko veću štetu, zbog objektivne opasnosti da se aktuelna politika obračuna sa istorijom i kulturno- historijskim naslijeđem radi, najblaže rečeno, promašenih tajkunskih interesa..

Sve ovo polako svjedoči još težoj i široj manifestaciji društvenog problema koji imamo, te stoga svi zajedno moramo pokazati da sistem nije i neće pokleknuti pod političkim pritiscima kad je u pitanju javni interes i zaštita istorije ove zemlje. Manifestaciju prakse koju pominjem možemo vidjeti prilikom gradnje zgrada na Ilidži (Lužani, Vreoci, korito rijeke Željeznice, Otes, Stup, Blažuj itd.), gdje se predviđena spratnost ne poštuje na način da se gradi između 2 i 5 spratova više od predviđenog prema aktuelnom planu.

Regulacioni plan Centar (Lužani) nedostupan je javnosti (građanima i medijima) iako se upravo na području koje pokriva taj plan danas gradi najviše. Brojni su prigovori građana, ali i medijsko informisanje o toj negativnoj pojavi na Ilidži. Prilikom takvih radnji nerijetko se ugrožavaju i zaštićena područja (zaštićeno vodno područje rijeke Željeznice, nacionalni spomenici pod zaštitom države - Rimske iskopine, arheološki lokalitet Butmirski neolit).

Zbog svega navedenog tražim od svih nadležnih institucija, tužilaštva, inspekcija, zavoda i resornih ministarstava da se svi u skladu sa svojim nadležnostima uključe u rješavanje ovih problema u namjeri da se spomenuta praksa trenutno zaustavi, te odgovorni sankcioniraju za počinjenu štetu .

Sve navode je vrlo lako provjeriti samo posjetom navedenim lokalitetima, a na kraju krajeva, i nas uvaženi ministar Lukić je u medijima izjavio da postoje veliki problemi u Opštini Ilidža kada je u pitanju poštivanje urbanističko-planske dokumentacije, te da je komunikacija Opština Ilidža-Kanton Sarajevo (nadležna ministarstva i zavodi) gotovo pa prestala.

Kako je u ovakvim slučajevima vrijeme reakcije institucija izuzetno važan faktor da se zaustavi potencijalna šteta u prostoru, molim nadležne na što je moguće efikasniju reakciju.

Sarajevo, 26.04.2017.

Segmedina Srna Bajramović
Zastupnica SDP BiH u SKS

